



Selasa, 26 September 2023

Ogen: Amos 7:1-6



Erkusur Ukur Tuhan



Erkusur ukur Tuhan janah nina, "kai si ukurindu e labo pagi jadi." Enda perkatan Tuhan man Nabi Amos. Situhuna, lit pengenehen Nabi Amos kerna perbahanen Tuhan nandanghi bangsana. Arah pengenehenenna, ia ngidah sada bala labang si melala mangani kasa kai si meratah-ratah si lit i bas negeri e. Pengenehen sideban si rehna i bas Tuhan, iidahna lawit si i teruh doni enggo keru ipan api, janah negeri e pe enggo mulai ipanna. Pengenehenenna e duana sada pertanda ukumen si ate Dibata isehkenNa man bangsa Israel.

I bas teptep pengenehenen e, Amos ertoto man Tuhan. Iakuina erdosa bangsana, janah mindo gelah ialemi. Ula min jadi ukumen Tuhan e bagi si idahna arah pengenehenenna. Iakuina pe bangsana e bangsa si kitik, si labo ngasup mulahi bana arah ukumen Dibata e nari. Kai kal pe labo banci ibahanna guna ngelawan Dibata. Teridah maka Nabi Amos erkeleng ate man bangsana. La mela ia ngakuken dosa bangsana. Ipeterukna ukurna, si teridah arah perkatanna, 'kami enda bangsa si kitik i doni enda. Iakuina pe maka Dibata ngasup erbahan kai pe lako encidahken kuasaNa ras ise kal pe labo ngasup naluken kuasaNa e.

Ngena ate Tuhan perbahanen nabi Amos si ermeteruk ukur, si nggit ngakuken kesalahen bangsana. Erkiteken si e, erkusur ukur Tuhan. E maka nina: "kai si idahndu e labo pagi jadi." Teridah kal maka belinen keleng ate Tuhan asangken ukumen si ateNa isehkenNa man bangsaNa. Isalihkenna keputusen si enggo ibahanNa.

Biak meteruk ukur ras nggit ngakuken kesalahen e situhuna perlu kal ipebelin i bas kita. Labo kita lit si sempurna, si la pernah erbahan dosa. Tapi, tupung kita nggit ngakuken dosanta man Dibata, turah ateNa mekuah. E me si erbahansa erkusur ukurNa, salihkenna ukumen jadi keleng ate.